

Æskulýðsstarf
Hestamannafélagsins Þyts



Starfsskýrsla 2011-2012.

Æskulýðsnefnd Þyts 2011-2012.

Guðný Helga Björnsdóttir, formaður

Aðalheiður Sveina Einarisdóttir

Helga Rós Níelsdóttir

Irena Kamp

Sigrún Eva Þórisdóttir

Þórdís Helga Benediktsdóttir, tengiliður við stjórn

Uppskeruhátíð.

Þann 29. október 2011 var haldin uppskeruhátíð barna og unglinga í Félagsheimilinu Ásbyrgi. Að venju var vel mætt af unglingum, börnum og foreldrum þeirra. Boðið var uppá kökur og brauðmeti sem foreldrar og forráðamenn í æskulýðsstarfinu höfðu töfrað fram. Það er frábært hversu foreldrarnir og forráðamenn barnanna eru dugleg að fylgja þeim eftir í starfinu og hjálpa til við það sem við í nefndinni leitum eftir. Á hátíðinni voru veittar viðurkenningar fyrir knapa ársins í unglinga- og barnaflokki. Viktor Jóhannes Kristófersson var knapi ársins í barnaflokki og Helga Rún Jóhannsdóttir í unglingaflokki. Öll börn sem tekið höfðu á einhvern hátt þátt í vetrarstarfinu fengu gjafir frá Æskulýðsnefndinni. Formaður fór yfir starf liðins árs og það sem væri á döfinni á komandi ári. Æskulýðsnefndin þakkaði að lokum iðkendum kærlega fyrir samstarfið og foreldrum og aðstandendum sérstaklega fyrir frábæra þátttöku og viðtökur við hverskonar beiðni um aðstoð.

Þrettándagleði.

Þrettándagleðin var haldin á þrettándanum í samstarfi við Grunnskóla Húnaþings vestra. Hópreið var með álfakóng og drottningu í fararbroddi, ásamt hirðmeyjum, grýlu, leppalúða og nokkrum jólasveinum, margir voru svo fótgangandi á eftir hersingunni. Allt voru þetta krakkar sem eru í æskulýðsstarfi félagsins sem tóku þessi hlutverk að sér. Riðið var frá Grunnskólanum að sjúkrahúsinu og eldri borgaraíbúðunum, þar sem sungnir voru áramótasöngvar. Hópreiðin/gangan endaði svo í reiðhöllinni Þytsheimum þar sem öllum



var gefið kakó, kaffi og kökur sem foreldrar og aðstandendur í æskulýðsstarfinu höfðu framreitt. Þar voru tónlistaratriði, leikir og teymt undir börnum í reiðhöllinni. Þessi dagur tókst mjög vel í alla staði, og stóðu krakkarnir sig vel að vanda.

Fundir.

Nokkrir fundir voru haldnir á starfsárinu, bæði foreldrafundir um starfið og nefndarfundir.

Reiðþjálfun og fimleikar á hesti (voltigieren).

Mikill áhugi var á reiðþjálfun og fimleikum á hesti. Um 60 börn á öllum aldri tóku þátt í reiðþjálfun, fimleikum á hesti eða Knapamerki í vetur. 4 unglingar luku prófi í Knapamerki 2 og 11 luku prófi í Knapamerki 1. Fanney Dögg Indriðadóttir sá um reiðkennsluna og Knapamerkin og tókst það mjög vel. Irina Kamp og Kathrin Schmitt sáu um fimleika á hesti.

Mjög mikil þátttaka var í námskeiðinu fimleikar á hesti og var biðlisti eftir að komast þar að. Þar geta komið krakkar sem hafa ekki aðgang að hestum og eykur þetta mjög áhuga þeirra á hestamennskunni. Í fimleikum á hesti var byrjendahópur og svo hópur fyrir lengra komna. Bæði var kennt í íþróttahúsinu á fimleikahestum og í reiðhöllinni á alvöruhestum.



Reiðþjálfunin voru 10 tíma námskeið og voru 18 krakkar á ýmsum stigum reiðmennskunnar sem tóku þátt í þeim.

Grunnskólamótin.

Æskulýðsnefndir hestamannafélaganna á Norðurlandi vestra halda þrjú mót yfir veturinn, sem þau kalla Grunnskólamót. Þá keppa krakkarnir fyrir þann skóla sem þau eru í og safna stigum. Mótin voru haldin í Arnargerði á Blönduósi, í Svaðastöðum á Sauðárkróki og í Þytsheimum hér á Hvammstanga. Góð



Þátttaka var í þessum mótum. Þau eru byggð upp á því að allir geti tekið þátt og æft sig í að keppa. Keppt er í þremur aldursflokkum. Elsti hópurinn 8. – 10. bekkur keppa í tölti, fjórgangi, smala og skeiði. 4.-7. bekkur keppa í smala, tölti, og tví- eða þrígangi. Í tvígangi sýna þau fet og tölt eða brokk, í þrígangi sýna þau fet, tölt og brokk. Ekki þurfa þessi aldursflokkar að sýna stökk, enda getur það verið erfitt fyrir lítið reynda knapa inni í reiðhöllunum. Yngsti aldursflokkurinn í 1. - 3. bekk keppa í þrautabraut og fegurðarreið. Á meðfylgjandi mynd eru sigurvegarar í skeiði á mótinu á Sauðárkróki. Þar voru Þyts-unglingar í fyrsta og öðru sæti, en þau voru mjög öflug að safna stigum fyrir okkar lið með góðum skeiðsprettum.

Sýningar.

Fyrsta maí var haldin æskulýðssýning í Þytsheimum. Þar tóku allir krakkarnir í æskulýðsstarfinu þátt. Mörg atriði voru, m.a. fimleikar á hesti, teymingaratriði, skrautreiðar, grínatriði þar sem gert var grín að fullorðnu knöpunum. Hægt er að sjá hluta af atriðunum á vefnum youtube.com, með því að setja inn leitarorðin Æskulýðssýning Þyts 2012.



Krakkarnir í Knapamerkjunum tóku líka þátt í Stórsýningu Þyts í lok mars. Þar voru þau með atriði sem kennarinn þeirra Fanney Dögg stjórnaði. Í atriðinu sýndu þau á skemmtilegan hátt hvað þau væru að fást við á námskeiðunum. Einnig opnaði hluti af krökkunum í æskulýðsstarfinu sýninguna með skrautgöngu með fána.



Krakkarnir í hestafimleikunum fóru með atriði á sýninguna Æskan og hesturinn sem haldin var í Top Reiderhöllinni á Akureyri í maí byrjun. Á myndinni hér til hliðar er hluti þeirra. Einnig var þeim boðið að koma með atriði á sýninguna Æskan og hesturinn í Reykjavík og fór hluti þeirra með atriði þangað.



Ferðalag

Æskulýðsnefndin ákvað að bjóða upp á ferðalag án hesta. Þar er skemmst frá að segja að þátttaka var með afbrigðum góð. Það fylltist stór rúta af áhugasömum krökkum og nokkrum foreldrum þeirra til að fara í ferðalag saman.

Hestamannafélagið styrkti okkur með því að borga rútuna. Farið var í Skagafjörð og hestabúgarðarnir Hof á Höfðaströnd og Þúfur voru skoðuð. Mette var með stutta sýnikennslu í reiðhöllinni. Einnig var farið í Hóla þar sem aðstaðan og reiðhöllin voru skoðuð og fékk hópurinn að fylgjast með reiðkennslutíma í reiðhöllinni. Þar var Sögusetur íslenska hestsins einnig skoðað. Á heimleiðinni var stoppað og ferðalangarnir fengu pizzu og farið í sund á Blönduósi.



Sumarið.

Krakkarnir og unglingarnir voru dugleg og að taka þátt í ýmsum keppnum í sumar bæði í heimahéraði og nálægum héruðum. Þeim börnum og unglingum sem komust á Landsmót stóð til boða að fá leiðbeiningar og aðstoð frá Fanneyju Dögg Indriðadóttur. Flottir fulltrúar frá okkar félagi mættu svo galvaskir á Landsmót í Reykjavík og stóðu sig með þryði. Þau voru einnig fulltrúar þyts í hópreiðinni.



Við í æskulýðsnefnd þyts erum mjög ánægð með árið hjá okkur, krakkarnir í mikilli framför sem hestamenn, reiðmenn og íþróttamenn. Foreldrar hafa verið mjög duglegir eins og áður að aðstoða við það sem þarf, enda gengi ekki svona starf nema með virkum foreldrum því margir eiga um langan veg að fara til að mæta á námskeið einu sinni í viku allan veturinn. Vonum við að starfið haldi áfram að blómstra eins og verið hefur undanfarin ár.

Mikið af myndum er hægt að sjá úr starfinu í myndaalbúmi á heimasíðu þyts thytur.123.is.

Kær kveðja

Æskulýðsnefnd þyts.